

Insula.
Nomina.

Situs.

Celi temperies.

Soli fertilitas.

Animalium
varietas.

ZEILAN, vel Ceilon Insula Arabibus dicitur *Tenarizim* & *Ternasser* Terra deliciarum: & Indis *Hibernarum*. Hæc Ptol. *Taprobana* Barrio & Corsalo testibus: quod idem constanter affirmat Varrerius, in suo de Ophyra Regione Opusculo. Quorum sententiæ lubens accedit Ortelius in suo Thesauro Geographico, Mercator vero noster censet *Nanigerim* (*Panigeneris* habent Græci Ptolemæi codices) esse: cui alij potius fidem habendam arbitrantur: Ego item in medio relinquo. *Zeilan* vero Insula præstantissima jacet non longe a Comorino Promontorio, x gradibus ab Æquatore. Ambitus ejus cccxl Leucarum, vel ut alij dicunt cccio aut idcc Milliarium: Longitudo Leucarum lxxv i i t, seu Milliarium cccxl, vel ccl. Latitudo autem Leucarum xlv, aut Milliarium cxl. Hæc licet sub Zona torrida, subque candenti Sydere sita, Cælo tamen ita temperato, Aere tam salubri fruitur, ut omnes Indiæ Provincias hac parte excedat: nonnulliq; isthic Paradisum terrestrem fuisse olim arbitrentur. Mira Cæli clementia incredibilisque temperies hyeme æstateq; nunquam favientibus. Ager fertilis perpetuo viret. Flores varij leguntur. Adeo ut cum Poeta de hac Insula canere liceat;

*Hic ver purpureum, varios hic Flumina circum
Fundit humus Flores*

Arbores perpetuo Floribus aut Fructibus onustæ sunt, ut sunt Mala Assyria incredibili suavitate, Mala Medica, Citria optima, Aurantia, Limones, alijque fructus nobilissimi. Fert & Palmam & Aromata, Cinnamonum, Cardamomum, Caryophyllum, Piper, aliaque. Ceterum Incolis cibum, potum, navigia, unica Palma subministrat. Fructum vocant *Coquen*, librum *Cayro*. Ex Arborum truncis naves compinguntur, è folijs vela, ex cortice funes, cujus tenuioribus partibus pro filo utuntur ad vela consueunda, trabesque colligandas, sine ullo clavo ferreo: ita exstructam navem onerant fructibus ejusdem arboris, Oryza tamen parce hic provenit quæ ex Regno Malabar & Caromandel copiose eo defertur. Auri, Argenti, ceterorumque Metallorum Fodinas habet, quas tamen Reges non permittunt exhauriri, eas velut thesaurorum loco in ostentationem servantes. Nonnullis causa videtur: ne quis illis Bellum inferat, cupidine Auri. Ferrum quoque, Linum & Sulphur producit. Eboris item ingentem vim. Sunt & Gemmæ hujus Insulæ plurimæ, Rubini, Hyacinthi, Saphyri, Chrysolithi, Topazij, & quos vulgo vocant *Ochi digatta*. Ferarum omne genus Cervorum, Hinnulorum, Aprorum, Leporum, Cuniculorum, & similium magna copia. Elephantorum vero nusquam major frequentia & bonitas. Hos venales habent miro modo. Ad mensuram enim admetiuntur, ut Pannos, Aulæa, Telam, pretio in singulos palmos definito: ita cum magnitudine crescit aestimatio. Sunt vero hi Elephantii totius Indiæ Orientalis nobilissimi, atque a ceteris, ut verissime probatum esse memorat Hugo Linscotanus, ejusdem generis Animantibus ex alijs locis privata veneratione adorantur.

Sed